



Broj/Број: 1/4-50- 1-265-17/04
Sarajevo/Сарајево: 17.04.2004. godine

ZAPISNIK

17. sjednice Komisije za finansije i budžet Predstavničkog doma Parlamentarne skupštine BiH koja je održana 17.04.2004. godine, u vremenu od 8,30 do 9,00 sati.

Sjednici su prisustvovali članovi Komisije: Nikola Kragulj, Filip Andrić, Fatima Leho, Beriz Belkić, Hazim Felić, Ljiljana Milićević i Mirko Blagojević.

Sjednici Komisije nisu prisustvovali: Abdulah Nakaš i dr Zlatko Lagundžija.

Od gostiju sjednici su prisustvovali: Ljubiša Vladušić i Dragan Kovačević, predstavnici Centralne banke Bosne i Hercegovine.

Sjednici je prisustvovala i Dragica Hinić, sekretar Komisije.

Sjednicom je predsjedavao Nikola Kragulj, predsjedavajući Komisije.

Za sjednicu je predložen slijedeći

DNEVNI RED:

1. Razmatranje Godišnjeg izvještaja Centralne banke BiH za 2003. godinu;
2. Razmatranje Finansijskih izvještaja Centralne banke BiH za 2003. godinu.

Dnevni red usvojen je jednoglasno.

Nikola Kragulj predložio je istovremeno razmatranje obje tačke dnevnoga reda, što je jednoglasno prihvaćeno.

Ad.1. Razmatranje Godišnjeg izvještaja Centralne banke za 2003. godinu i Finansijskih izvještaja Centralne banke BiH za 2003. godinu

Nikola Kragulj ukratko je informirao prisutne o Godišnjem izvještaju i Finansijskim izvještajima Centralne banke BiH za 2003. godinu.

Fatima Leho izrazila je zadovoljstvo predloženim izvještajima za 2003. godinu. Istaknula je povećanje budžetskih rezervi, koje su čak i veće od zahtjeva Currency Boarda. Također, istaknula je potrebu za formiranjem Fonda za razvoj poljoprivrede i stočarstva, koji bi u mnogome dao doprinos poboljšanju trenutne ekonomske situacije u zemlji. Zbog nedostatka sredstava u Budžetu za potrebe ovog fonda iskazala je inicijativu da se Fond finansira iz dijela dobiti kojim raspolaže Centralna banka BiH. Mišljenja je da je potrebno inicirati izmjenu Zakona u dijelu koji se odnosi na raspodjelu dobiti Centralne banke BiH, kako bi se jedan dio dobiti usmjerio u razvoj poljoprivrede.

U tom kontekstu postavila je konkretno pitanje predstavnicima Centralne banke BiH da li je moguće i na koji način formirati navedeni Fond.

Dragan Kovačević istaknuo je da su izvještaji rađeni po Zakonu o Centralnoj banci BiH. Saglasno odredbama ovog zakona, ne postoji mogućnost promjene preraspodjele dobiti, jer je obaveza 10% dobiti usmjeravati za potrebe jačanja aktive Centralne banke. Ako se želi omogućiti drugačija raspodjela dobiti, mora se izmjeniti postojeći Zakon o Centralnoj banci. Stoga je predložio da se usvoje izvještaji za 2003. godinu, a da se pokrene inicijativa u pravcu promjene postojećeg zakona.

Ljubiša Vladušić potvrdio je izložene činjenice istaknuvši trenutnu situaciju u regionu. Tako je naveo da u Srbiji i Crnoj Gori Centralna banka ne zadržava niti jedan procenat od aktive, dok je u Hrvatskoj taj iznos 5 % od ukupne aktive. Pri tome je naglasio ulogu MMF-a u ovom procesu.

Beriz Belkić je poslije izloženih činjenica istaknuo prijedlog Domu da usvoji Godišnji izvještaj Centralne banke BiH i Finansijske izvještaje Centralne banke za 2003. godinu, uz zaključak kojim Dom, uz podršku i saradnju Predsjedništva BiH, Centralne banke BiH i Vijeća ministara BiH, treba pokrenuti inicijativu za izmjenu Zakona o Centralnoj banci BiH, u dijelu koji regulira raspodjelu dobiti Centralne banke BiH, kako bi se dio ove dobiti usmjeravao za potrebe države BiH. Na ovaj način, uskladili bi smo postojeću regulativu BiH sa regulativom zemaljama u regionu.

Hazim Felić i Ljiljana Milićević predložili su dopunu ovog zaključka u pravcu da Komisija za finansije i budžet bude uključena u cjelokupni proces izmjena postojećeg zakona.

Nakon okončane rasprave članovi Komisije jednoglasno su prihvatili:

1. Godišnji izvještaj Centralne banke BiH za 2003. godinu,
2. Finansijske izvještaje Centralne banke za 2003. godinu,
3. Zaključak kojim Komisija predlaže Domu da, uz podršku i saradnju Predsjedništva BiH, Centralne banke BiH i Vijeća ministara BiH, pokrene inicijativu za izmjenu Zakona o Centralnoj banci BiH u dijelu koji regulira raspodjelu dobiti Centralne banke BiH, kako bi se dio dobiti Centralne banke BiH usmjeravao za potrebe države BiH. Za nosioca i koordinatora inicijative određuje se Komisija za finansije i budžet.

Zapisnik sačinila :

Dragica Hinić

Predsjedavajući Komisije:

Nikola Kragulj